

**VENDIM**  
**Nr. 289, datë 19.5.2021**

**PËR DISA NDRYSHIME DHE SHITESA NË VENDIMIN NR. 95, DATË 4.2.2015,  
TË KËSHILLIT TË MINISTRAVE, “PËR PROCEDURAT PËR VLERËSIMIN E  
KËRCËNIMIT TË RREZIKUT PËR JETËN DHE PAJISJEN ME AUTORIZIM TË  
POSAÇËM PËR MBAJTJE ARME”, TË NDRYSHUAR**

Në mbështetje të nenit 100 të Kushtetutës dhe të pikës 2, të nenit 30, të ligjit nr. 74/2014, “Për armët”, të ndryshuar, me propozimin e ministrit të Brendshëm, Këshilli i Ministrave

**VENDOSI:**

Në vendimin nr. 95, datë 4.2.2015, të Këshillit të Ministrave, të ndryshuar, bëhen këto ndryshime dhe shtesa:

1. Shkronja “a”, e pikës 4, ndryshohet, si më poshtë vijon:

“a) Kërkesa e personit, që kërcënohet për shkak të aktivitetit shtetëror ose rrethanave personale të veçanta për pajisjen me autorizim të posaçëm për mbajtje arme, e cila bëhet *online*, në portalin unik qeveritar *e-Albania* dhe duhet të përmbajë:

- gjenealogjetet e plotë të personit (emër, atësi, mbiemër, datëlindje);
- adresën e banimit;
- numrin e kontaktit;
- arsyen për të cilën kërkohet të pajiset me autorizim të posaçëm;”.

2. Pas pikës 4 shtohet pika 4/1, me këtë përmbajtje:

“4/1 Në zbatim të ligjit nr. 74/2014, “Për armët”, të ndryshuar, personi, përveç dokumenteve të dorëzuara *online*, duhet të kryejë paraprakisht procedurat përkatëse për të siguruar dhe dorëzuar fizikisht dhe origjinale në komisariatën e policisë ku ka vendbanimin, jo më vonë se 15 (pesëmbëdhjetë) ditë nga momenti i plotësimit *online* të kërkesës, edhe dokumentet e mëposhtme:

- raportin mjeko-ligjor lëshuar nga autoriteti përkatës, brenda 6 muajve të fundit, që vërteton se është i aftë nga ana mendore dhe fizike;

- dëshminë e aftësisë teorik-praktik për përdorimin e armës.”.

3. Pika 5 ndryshohet, si më poshtë vijon:

“5. Këto dokumente, të administruara në komisariatën e policisë, brenda 5 (pesë) ditëve pune, dërgohen për t’u regjistruar në drejtorinë vendore të policisë, e cila, pasi bën vlerësimin dhe shpreh mendimin mbi dokumentacionin e dërguar nga komisariati i policisë, e përcjell atë për shqyrtim në Komisionin Qendror në Policinë e Shtetit.”.

4. Pika 6 ndryshohet, si më poshtë vijon:

“6. Rrethana personale të veçanta konsiderohen ato kur, për shkak të detyrës, rrethanave të rastit ose flagrancës, personi ka dijeni për kryerjen e veprës penale, është lehtësisht i identifikueshëm nga autorët e veprës penale dhe për këtë shkak i rrezikohet jeta.”.

5. Pika 7 ndryshohet, si më poshtë vijon:

“7. Komisioni shqyrton dokumentacionin e paraqitur nga drejtoria vendore/rajonale e policisë ku ka vendbanimin personi i kërcënuar për shkak të aktivitetit shtetëror ose rrethanave personale të veçanta dhe merr vendim për lëshimin e autorizimit brenda 10 (dhjetë) ditëve nga paraqitja e kërkesës.”.

6. Pika 10 shfuqizohet.

7. Pika 11 ndryshohet, si më poshtë vijon:

“11. Afati i vlefshmërisë së autorizimit të posaçëm për mbajtje arme bazohet në vlerësimin e ekzistencës së kërcënimit dhe rrezikut për jetën, vlerësim i cili kryhet të paktën çdo 1 (një) vit.”.

8. Pas pikës 11 shtohen pikat 11/1 dhe 11/2, me këtë përmbajtje:

“11/1 3 (tre) muaj përpara përfundimit të afatit të autorizimit të posaçëm, shtetasi ka të drejtë të paraqesë kërkesë për rivlerësimin e ekzistencës së kërcënimit dhe rrezikut për jetën, me qëllim rinovimin e autorizimit. Për rinovimin e autorizimit shtetasi duhet të ndjekë të njëjtat procedura, si në rastin e pajisjes me autorizim të posaçëm, për herë të parë.

11/2 Në rast se Komisioni nuk vendos për rinovimin e autorizimit të posaçëm, në zbatim të nenit 42, të ligjit nr. 74/2014, “Për armët”, të ndryshuar, personit i pushon vetiu e drejta për mbajtjen e armës dhe detyrohet që, brenda 3 (tri) ditëve, ta dorëzojë në organin përgjegjës të Policisë së Shtetit që ka për detyrë administrimin e armës.

Pas dorëzimit të armës në organin përgjegjës të Policisë së Shtetit, që ka për detyrë administrimin e armës, personi ka të drejtë:

a) të ndjekë procedurën për tjetërsimin (shitjen) e armës sipas nenit 39, të ligjit nr. 74/2014, “Për armët”, të ndryshuar;

b) të kërkojë autorizim për mbajtje arme në vendbanim. Në këtë rast ndiqen procedurat, rregullat dhe afatet për vlerësimin e përmbushjes së kriterëve, për pajisjen me autorizim, për mbajtje arme në vendbanim.”.

9. Pika 16 ndryshohet, si më poshtë vijon:

“16. Ngarkohen Ministria e Brendshme dhe Drejtoria e Përgjithshme e Policisë së Shtetit për zbatimin e këtij vendimi.”.

Ky vendim hyn në fuqi pas botimit në Fletoren Zyrtare.

**ZËVENDËSKRYEMINISTËR**  
**Erion Braçe**